

Siulittaasup 2026-mi ataatsimeersuarnermi nalunaarutaa

2025 NunaGreenimut aammalu Kalaallit Nunaanni nukissiornermut suliassaqarfimmut ukioq ulapaarfiuvoq ilikkagaqarfiullunilu

NunaGreen-ip ukiuni kingullerni suliassaasa pingaarnersarisimavaat Utoqqarmiut Kangerluarsunnguanni innaallagissiorfimmut tunngavissaliinissaq aammalu allilerneqarnissaata aallartinnissaa. Tamanna nunatsinni illoqarfiit pingaarnersaannut ukiuni qulikkaani arlalinni siunissami isumannaatsumik, piujuartussamik mingutsitsinngitsumillu nukissiamik pilersuilersitsisussaavoq.

Tulliullugu Qeqertarsuup Tunuani nunattalu sinnerani mingutsitsinngitsumik nukissiorinissaq ingerlatseqatigiiffiup sulissutigaa, taamatullu Kalaallit Nunaanni nukissiornermut suliassaqarfik ataatsimut isigalugu niuernermik tunngavilimmik ineriartortitsinissamut periarfissaasinnaasunik paasiniaanissaq nalilersuinissarlu, ingerlatseqatigiiffiup siunertaasa ilagaat.

Nunagreen 2025-mi suliassaqarfinni pingasuni tamani sulisimavoq. Kisianni Utoqqarmiut Kangerluarsunnguanni innaallagissiorfiup allilerneqarnissaata ingerlanneqarnissaa, taamaaliornermilu illoqarfiit pingaarnersaanni nukissiamik pilersuinerup siunissamut qulakkeernissaa, pingaarnertut suliassaasimasoq suliassaasorlu qularutigineqanngilaq.

2025 suliniutinut tunngatillugu ulapaarfiusimavoq

2025-mi upernaakkut Nunagreen-ip entreprenørnit suliffissui pingasut suliassanut tamakkiisunut sanaartugassamut akigititassanut isumaqatigiissutissap neqeroortitsivigineqarnissaanut piukkunneqarput, tamatuma kingorna neqeroortitsineq qaammataluit qaangiunneranni aallartinneqarluni.

Septembarimi ajoraluartumik paasinarsivoq suliffissuaq ataasiinnaq suliassamut neqerooruteqalersaartoq.

Nunagreen-ip oktobarimi neqeroorut teknikkikkut pitsaasumik pitsaassusilik tiguaa, kisianni aamma ajoraluartumik ingerlatseqatigiiffiup piujuartussatut imaluunniit piviusorsioortutut isiginngisaanik akeqartitsilluni.

Siunnersortit neqerooruteqartorlu qanimut suleqatigalugit NunaGreen-ip suliaq aallartippaa, tassani siunertaalluni akigititanik appartitsinissamut periarfissaqarnersoq paasiniaanissaq – aaqqiissutissat, suliat ingerlanissai imaluunniit piffissaliussat naleqqussarneqarnerisigut. Taamaattoq suliassami pilersuinerup isumannaatsuutinnissaa pitsaasuutinnissaalu annikillisinnaq.

Ilungersorluta sulingaluarluta 2026-p aallartinnerani oqaatigisariaqalerparput anguniakkap angunissaa iluatsittussaajunnaartoq. Aammalu siunnersortit, piginnittut qaninnerpaatullu suleqatigisarput Nukissiorfiit isumasioqatigalugit NunaGreen-ip neqeroortitsinerup taamaatinissaa aalajangiuppaa.

Tamatununga niuerfimmi pissutsit aammalu ataatsimut isigalugu ineriartorneq pissutaapput, taamatullu neqeroorut ataasiinnaatillugu unammilleqatigiinnissaq ajornakusuulertartoq piviusuummat.

Taavami sanaartugassamut akigititassanut isumaqatigiissutip atsiorneqarnissaa iluatsinngimmat, Nunagreen-ip 2025 sunik pissarsiaqarfigaa, amerlasuut aperissagunarput.

Sanaartugassani tamarmiusuni annaasaqarsinnaanerit annikillisinnissaat siunertaralugu, ukiuni qaangiuttuni ingerlatassat annertuumik pitsanngorsarlugit ingerlanneqarput.

Entreprenøri najukkameersoq suleqatigalugu Utoqqarmiut Kangerluarsunnguanni aqqusernit aqquitasussat pioreersut nutarterneqarput, aammalu suliasap sumiiffissaata tungaanut sanaartornermi aqqusinissaq 8 km missaa sananeqarpoq. Aqqusiniornermi siusissukkut aallartitsineri siunertaasimavoq, ingerlasussanik piareersaanerup, tikikkuminassusaata, tamatumalu kingorna ingerlatassat pingaarnerit siumut ingerlanissaannut periarfissat pitsanngorsarnerisigut, suliasap aarlerinaateqannginnerulersinnissaa, tassanilu ilaapput sulluliorneq aammalu erngup nukinganut nunap iluani putuliornerit.

Tamatuma ingiaqatigisaanik suliasap ajornakusoornerpaartaani, 16 km missaanik takissusilimmik sulluliornissami, nunap sannaani teknikkikkut suliarinninnermilu nalorninartut annikillisinniarlugit, NunaGreen-ip tapertaasumik misissueqqaarnerit ingerlappai, ilanngullugit qaarsup pitsaassusaanik uuttortaanerit annertunerusut. Suliarineqartut taakkua tamarmik aalajangiinissamut tunngavissanik pitsaanerulersitsipput aammalu suliasap ingerlanneqarnerata ingerlaqqinnissaanut pilersaarusiornissaq patajaannerulersillugu.

Suliasamut atatillugu ingerlatseqatigiiffiup taarsigassarsinissaanut naalagaaffiup qularnaveeqqusiinissaanut tunngavissaqalersitsinissamut NunaGreen piginnitorput qanimut suleqatigalugu annertuumik suliaqarpoq. Suliasap politikikkut aallartinneraniilli aningaasalersuinissap tapersernissaa pillugu danskit naalagaaffiannut siunertamut nalunaarut isumaqatigiissutigineqarpoq. Suliaqarneq taanna naalagaaffiup qularnaveeqqusiinissaanut ilusiliamik aalajangersimasumik, suliasap aningaasalersornissaanut ingerlaqqinnissamut toqqammavissaliisussamik, kinguneqarpoq.

Tamanna tunngavigalugu piareersaataasumik aningaasalersuinissamut neqeroortitsineq NunaGreen-ip ingerlappaa, taassumalu takutippaa Utoqqarmiut Kangerluarsunnguanni innaallagissiorfiup allilernissaata aningaasalersornissaanut niuerfimmit patajaatsunik soqutiginnittoqartoq.

Piujartitsinissamut periusissiaq

2025-mi NunaGreen tulleriissaarnerusumik periaaseqarluni isiginnittaatsiminilu ilaatillugu piujartitsinissamut annertuumik alloriarpoq. Nunani tamalaani malitassat aammalu sunniivigeqatigiinnermik misissueqqissaarnerup ingerlanneqarnera tunngavigalugit silap pissusaata, inuiaqatigiinni pissutsit ingerlatseqatigiiffimmilu aqutsilluarnerup iluanni pingaartinneqartut ersarissut paasineqarput.

Ingerlatseqatigiiffiup piujartitsinissamut periusissiaanut tunngavigineqarpoq, sanaartornerup ingerlanerani suliasatta silap pissusaanut sunniuteqarnissaa, kisianni peqatigisaanik ataavartumik nukissiornikkut taakkua piffissami ingerlanneqarfissaanni CO₂-mik aniatitsinerup annertuumik annikillisinneqarsinnaaneranut paasinnineq. Taamaalilluni periusissiami piffissami qaninnerusumi sunniinissaq piffissamut ungasinnerusumi inuiaqatigiinni nalilimmik sunniinissaq oqimaaqatigiissinneqarpoq.

Assersuutissaq aalajangersimasooq tassaavoq, Utoqqarmiut Kangerluarsunnguanni innaallagissiorfiup allilernerqarnerata suliarineqarnerani innaallagissiorfimmit pioreersumit sarfamik mingutsitsinngitsumik atuinissaq, tamannalu suliasami silap pissusaanut sunniinissaq tamarmiusumut annikillisitseqataassaaq.

Qarasaasiatigut paasissutissat pitsaanerulersinnissaat, tullerissaarnerusumik periaaseqarluni malinnaanissaq ersarinnerusunilu anguniagaqarnissaq ukkataralugit, piujartitsinermik suliaqarneq ukiuni aggersuni

ineriartorteqqinneqassaaq. Siunnerfigineqarpoq nukissiamut attaveqaasersuutitut suliassanik angisuunik akisussaassusilimmik ingerlatsinissap aammalu Kalaallit Nunaanni mingutsitsinngitsumut allanngoriartortitsinermut ataavartumik pitsaasumik tapersiinissap qulakkeernissaat.

Najukkami inissimatitsineq ilisimasanillu inerisaaneq

Najukkami inissimatitsinissaq aammalu ataavartumik nukissiornerup ineriartortinneqarnerata iluani piginnaasanik inerisaanissaq, NunaGreen-ip ingerlatamini tamani ersarissumik ukkataraa. Suliassat nukissiamik pilersuinermut aningaasaqarnikkullu naleqalersitsinermut iluaqusiiginnaratik, kisianni aamma suliassa qarfimmi kalaallit peqataanerannik piginnittuunerannillu nukittorsaanissaq, ingerlatseqatigiiffiup siunnerfilimmik sulissutigaa.

Najukkani ingerlatsisunik suleqateqarnikkut, kalaallit sulisussat akuutinnerisigut aammalu ingerlaavartumik ilisimasanik misilittakkanillu inerisaanikkut tamanna pivoq. Siunertaavoq ataavartumik nukissiornerup iluani Kalaallit Nunaata periarfissa qarfiisa annertoorujussuit ineriartorteqqinneqarnerisa kalaallit piginnittuutillugit, peqataatillugu piginnaaneqarfiilu atorlugit eqeersimaartumik annertusiartortumik pinnaanissaat.

Taavami 2026-mi sussaagut?

2026-mi NunaGreen-ip suliassanut tamakkiisunut sanaartugassami akigititassanut isumaqatigiissutip neqeroortitsivigineqarneranit ingerlanneqareersumit misilittakkat katersussavai aammalu patajaannerusumik oqimaaqatigiinnerusumillu akeqartitsinissap angunissaa siunertaralugu neqeroortitsinermut periusissiaq naleqqussassallugu. Suliaqarneq teknikkikkut siunnersortit qanimut suleqatigalugit ingerlanneqassaaq aammalu aaqqissuussaasumik niuerfimmi oqaloqateqarnernik tapertaqartinneqassalluni, tassani suliassap pisariussusaa, sanaartornerup siviluujusussaanaera aammalu qitiusumiittortaanni niuerfimmi nikerarnernit sunniisarneq takuneqarsinnaanerullutik, entreprenørerit neqeroortitsinerup ilusissaanut immersueqataasinnaallutik.

Suliassami ilaatinneqarput pilersuutit amerlasoorpassuit aammalu suliassanut immikkut ilisimasaqarlutik sulisussat – ilanngullugit sulluliorneq, elektronikkiniq motoorilinnillu atortulersuusersuinerit, pilersuineri aqqusersuutiniq ikkussuinerit kiisalu nalinginnaasumik entreprenørerit suliassai, soorlu aqqusinniorneq aamma sulisut ineqarfissaannik sanaartorneq. Tamanna tunngavigalugu naliliisoqarpoq sanaartugassamut akigititassanut isumaqatigiissutip aggulunneqarnera unammilleqatigiinnermik annertunerulersitsinnaasoq aammalu akigititat unammillersinnaassuseqarnerussasut. Peqatigisaanik NunaGreen-ip aarlerinaataasut suli oqimaaqatigiissumik agguarneqarnissaannik qulakkeerinissaa aalajangiisuulluinnarpoq, taamaalilluni suliassami aningaasaqarneq tamarmiisoq ingerlanneqarsinnaaneralu nukittorsarneqassallutik.

Suliassap angissusaa pisariussusaalu pissutigalugit peqqissaartumik eqqarsaatigilluakkamillu pilersaarusiornissaq pisariaqarpoq. Pilersaarusiornerup taassuma patajaatsuunissaata akisussaassusilimmillu pinissaata qulakkeernissaa kinguaassatsinnut pingaaruteqarpoq, taamaalilluni suliassaq tamatuma kingorna patajaatsumik, sunniuteqarluartumik siunissamullu isumannaakkamik ingerlanneqarsinnaassalluni.

NunaGreen-ip suliassaq aammalu suliassap Kalaallit Nunaanni nukissiamik pilersuinermut sunniutissaa pillugit Nukissiorfiit ingerlaavartumik suleqatigaa. Suliaqarneq taanna 2026-mi ingerlaqqissaaq, aammalu aqutsisut taamatullu Nukissiorfiit tamakkerlugu 2025-mi suleqatigiissimanitsinnut qutsavigaakka. Suliniutigut attuumassuteqarluarput aammalu suliap ingerlanerani ilisimasatsinnik piginnaasaqarfitsinnillu

avitseqatigiinnissaq atueqatigiinnissarlu annertuumik pisariaqartinneqarpoq. Tamatuma 2026-mi ingerlaqqinnissaa qilanaaraara.

Kiisalu siulersuisut tamaasa sinnerlugit ingerlatseqatigiiffiup pisortaanera sulisuilu soqutigisarpasuit akornanni pikkorissuseqarlutik ingerlasimmata aammalu 2025-mi Nuummi suliassaq annertooujussuarmik inerilluartissimmassuk, qutsavigerujussuarpakka.

Taamaalilluta 2026-mi patajaatsumik suliaqarnitsinni suliassap neqeroortitsivigeqqinnissaanut piareersinnaalissaagut, neqerooruteqartussat unammilleqatigiissinnaanerunissaat aammalu akigititap annasaqarsinnaanerullu oqimaaqatigiissinnissaat qulakkeerneqassasoq neriunarluni. Minnerunngitsumillu suliassap Kalaallit Nunaanni nukissionermut suliassaqarfimmi piujuartussamik ineriartortitsinissamik sutigut tamatigut tunngavissiiinissaa qulakkeerlugu.